

宛

卷

第

叢


江蘇古籍出版社

古逸民先生集

南海百詠 史詠集

南海百咏

江蘇古籍出版社



宛委別藏

(清) 阮 元 輯

江蘇古籍出版社出版

江蘇廣陵古籍刻印社整理

江蘇省新華書店發行

上海市印刷七廠印刷

開本：七八七×一〇九二毫米 三十二開

印張：一八九七·七五 插頁：四八〇

一九八八年二月第一版

一九八八年二月第一次印刷

ISBN 7-80519-073-9/Z·13  
定價：（全120冊） 2550 圓

四庫未收書提要

學經室外集卷三

南海百詠一卷提要

宋方信孺撰信孺字孚若莆田人以蔭補官開禧中  
假朝奉郎使金三往返歷淮東轉運判官知真州至  
廣西漕所著有好菴遊戲詩境集未見是編乃其官  
番禺漫尉時所作取南海古蹟每一事為七言絕句  
一首每題之下各詞其顛末注中多記五代南漢劉  
氏事所引沈懷遠南越志鄭熊番禺襍志近多不傳  
屬鴛宋詩紀事載劉后邨序信孺詩文云宮羽協諧  
經緯麗密于此亦足見其一斑矣

南海百咏序

境以詩名在在皆詩也境之近遠則東日下西王母  
南北戶北觚竹不足以喻其垠岸而南海百咏又特  
其境之寓者耳詩境方君來尉番山剡苔剔蘚訪秦  
漢以來數百年莽蒼之跡可攷者百而綴以詩可見  
胸中之磊落使其乘飛廉憑豐隆翱翔乎氛埃之上  
登崑崙絕頂凌閭闔扣玉壺憇轡乎扶桑之根以觀  
日之所出方壺員嶠橫陳浩蕩長麗裔皇絡其來御  
下視齊州不啻紅塵九點則境中之詩又可勝既耶

莆田葉孝錫於是特書其百篇之首時

今上躬耕籍田之明年三月既望

南海百咏目錄

番山

禺山

任囂城

三城

清海軍樓

五仙觀

廣平臺

石屏堂

十賢祠

鐵柱

藥洲

九曜石

越樓

南壕

法性寺

風幡堂

筆授軒

菩提樹

任鷲墓

淨慧寺千佛塔

衆妙堂

劉氏銅像

劉氏雙闕

番塔

海山樓

越井岡

越臺井

西竺山廣果寺

東七寺

西七寺

南七寺

北七寺

浮邱山

珊瑚井



朝漢臺

劉氏郊壇

劉王花塢

番人塚

花田

石門

貪泉

沉香浦

鑒空閣

靈洲

甘溪

馬蛟山

雷洞

蒲澗

滴水巖

菖蒲觀覺真寺

流杯池

葛仙翁煉丹石

鮑姑井

懸鐘

趙陀疑塚

寶象峯勝因寺

虎跑泉

動石

白雲洞

三教殿

鶴舒堂

大小水簾洞

虎頭岩

景泰山七仙寺

卓錫泉

順庵

陵山

馬鞍山

琵琶洲

相對岡

南海廟

浴日亭

銅鼓

波羅蜜果

王登洲

靈化寺

走珠石

廬循河南故城

大通寺

抱旗山

花山寺

黃巢磯

金芝巖

清遠峽

峽山廣慶寺

飛來殿

達磨石

釣臺

和光洞

沉犀潭

龍磨角石

老人松

資福寺羅漢閣

鳳凰臺

會仙觀

龍窟

金牛山

仙湧山

媚川都

劉氏山

南海百咏目錄終

南海百咏

番禺漫尉莆田方信儒孚若撰

番山

番禺二山也

山海經作賁禺

今在州學之後者政爾一

大磐石有亭榜以番山而禺山則漫不可考

按番禺志云番山在北禺山在南國初前攝

南海簿鄭熊所作番禺雜誌云番山在城中

東北隅禺山在南二百許步兩山舊相聯屬

劉龔鑿平之

龔魚檢切又丁鑑古田二切劉氏所謂高祖始霸南越者也龔字乃其自撰

就番

積石為朝元洞後更名為清虛洞而以沉香  
為臺觀於禹之上至圖經則謂番山在今府  
學後禹山在青海軍樓雉堞下見番在南而  
禹在北矣又元祐間林斐作兼山樓記亦謂  
番山在通判南廳之後禹山在州廨治事廳  
之東紹聖間章棨作移學記亦以為學在番  
山之前是皆與今說同然番禹志古書也熊  
為潘美容當時猶親見亭觀之舊宜以此二  
說為正况漕司貢院之東有神祠至今尚以

清虛洞為榜故老亦以名其地雖番山所在  
或治事廳東或清海軍樓下皆未可知而州  
學後者禺山無疑矣

城根片石久模糊圖記應須考國初欲識番山真面  
目至今東北號清虛

### 禺山

禺山何事作番山空有陂陀跡已漫今日升堂聽絲  
竹沉香不見舊欄杆

### 任囂城

番禹雜志云在今城東二百步小城也始囂所理後呼東城今為鹽倉即舊番禹縣也以今攷之東城即其地熙寧間呂居簡為帥因其遺址而築之見於邾亶之記圖經乃以子城為古之東城且引番禹志以為任囂所理殊不知番禹縣國初時尚在今城東之赤泥巷所以番禹雜志謂今番禹為舊縣也若以子城為是則安有舊縣在其中乎沈懷遠南越志云尉任囂疾篤知已子不肖不堪付以



後事遂召龍川令趙陀謂之曰秦室喪亂未  
有真主吾觀天文五星聚於東井知南越偏  
霸之象故名陀授以權柄云按任寬於秦末  
時為南海郡尉  
五星自是漢家符忍死任罵亦太愚今日朝臺猶百  
尺荒城不記舊規模

### 三城

子城與東西二城也子城乃慶歷四年魏公  
瓘以得古磚有委於鬼工之字遂築之後僊  
智高來寇望城堅不得逞而去東城乃熙寧

初呂居簡所請轉運使王靖所築西城則程  
師孟經始於熙寧四年

三城不斷鬱相望千里長江勢渺茫蠻獠傳聞亦膽  
破從知嶺外有金湯

### 青海軍樓

元符二年柯公述所創折公彥賢重建於紹  
興二十年近歲又一再作新矣

睥睨旁圍百尺樓羣飛縹渺接雲浮鯨波不動海山  
碧彈壓東南十四州

五仙觀

在郡治西其先有五仙人各執穀穗一莖六  
出乘羊而至衣與羊各異色如五方既遺穗  
與州人忽騰空而去羊化為石州人因其地  
為祠石今尚存或云吳滕脩時或云趙陀時  
或云郭璞遷城時俱未詳

踰躔天上五仙人羊駕何年到海濱晉漢相傳半無  
有觀中遺石自輪囷

廣平堂

宋廣平都督廣州越俗始知棟宇張燕公嘗  
為遺愛碑頌

撤茅易瓦利無窮盍種甘棠比召公大手斲碑何處  
覓典型猶見此堂中

### 石屏堂

在郡宅西蔣公之竒所建其下有池百餘步  
列石甚富劉氏所謂明月峽玉液池是也南  
北舊有舍珠亭紫雲閣每歲端午令宮人競  
渡其間

月峽旁通玉液池綵舟爭勝出宮闈荒臺今日人相  
問野草無言日自西

### 十賢祠

在郡治之城上前太守常川吳隱之宋璟李  
尚隱盧渙李勉孔戣盧鈞蕭昉為八賢蔣穎  
叔復以滕修王緄益之為十賢祠自作序贊  
列名刻石別有八賢祠蓋潘美向敏中余靖  
魏瓘邵煜陳世知陳從易張頡也乃連帥周  
自強所立

晉唐相望已千年香火如今數十賢不見古人空再  
拜祠堂西去有貪泉

### 鐵柱

野史云張鑄鐵柱十二築乾和殿今府之治  
事廳尚植其四柯公述所致也二者猶見於  
相安亭壕水中餘不知所在

崔嵬十二峙乾和五柱何如馬伏波敗墜顏垣今日  
見想曾荆棘漢銅駝

### 藥洲

在子城之西趾漕臺之北界舊居水中積石如林今西偏壅塞水尚滿其東幾百餘丈穴城而導於海綠淨如染圖經云偽劉聚方士習丹鼎之地南征錄亦謂是時有方士投丸藥於其中所以水色立變藥洲圖序乃以為葛稚川嘗煉丹於此非也

沙邱遺臭茂陵空何物能成九轉功地下劉郎猶有媿駕言聊作葛仙翁

### 九曜石

在藥洲水中圖經云石太湖舊產也本偽劉  
時有富民負罪者每運寘此以自贖遂成勝

景云

九峯參立倚空明好事傳聞應列星運石早知能贖  
罪上書何必待緹縈

越樓

樓在闌閣中輪囷為一郡之壯觀昔名共樂  
樓程師孟有詩

真珠市擁碧扶欄十萬人家着眼看獨恨登臨最高



處舉頭猶不見長安

南壕

在共樂樓下限以閘門與潮上下蓋古西澳也景德中高紳所闢維舟於是者無風波恐民常歌之其後開塞不常

經營猶記舊歌謠來往舟人趁海潮風物眼前何所似揚州二十四紅橋

法性寺

劉氏時為乾亨寺後復舊名今為報恩光孝

寺乃南越趙建德之宅虞翻之園園也相傳  
六祖祝髮於此圖經云本乾明法性二寺後  
併為一又云院有訶子取西廊羅漢院井水  
煎湯頗能療疾如此則又有羅漢之名當不  
止乾明法性二寺也

金碧參差堯率天曾煎訶子試新泉荒園廢宅無人  
問門外桃花却是禪

### 風幡堂

碓頭一語便投機若說風幡是落遲今日堂中容百

衆不知那箇可傳衣

### 筆授軒

卞山老人作記云昔制止鉢刺客誦彌伽釋迦對譯楞嚴經於此唐相國房融筆授之後蔣穎叔以筆授名其軒有石硯乃祁寮得於張季方家至今尚存軒今在光孝寺中蓋卿林向公子諱所復且有雲龕李公邴書榜及畫相國胡僧刻之於石

制止遺踪底處尋相傳筆授此叢林毗盧四萬八千

卷正要墨池如許深

菩提樹

菩提樹在六祖影堂前宋求那支摩三藏所  
手植六祖開東山法門於其下樹雖非故物  
亦其種也廣人凡遇元夕往往取其葉為燈  
而此寺獨盛

庭前雙寺尚依然何處猶叅無樹禪一自老盧歸去  
後年年長結萬燈緣

任囂墓

番禺雜志云囂廟在今法性寺前道東四十餘步廣民歲時享之墓在廟下法性寺今光孝寺也而墓與廟已不復存訪古者猶能想像其所在

枯墳曾閱幾興亡行客徘徊古道旁茅屋一間無處覓可憐不似楚昭王

### 淨慧寺千佛塔

塔在寺中高二百七十丈成於哲宗紹聖間郡人林修之力也其初規地得古井九環列

其外仍得寶劍巨鼎之類

九井神光射斗牛天開寶級鎮南州客船江上東西

路常識嶙峋雲外浮

近年歷代沿革內又以為太宗朝端拱二年建不知孰是

### 衆妙堂

在天慶觀之西偏

今元妙觀

昔道士何德順所作東

坡為之記并賦詩

妙處常存道豈高箇中得意自陶陶空堂寂莫豐碑  
在觀裏何人復種桃

### 劉氏銅像



雙闕峯堯即是碑天荒初破此娥眉行人來往手加額  
解說當年旌表時

### 番塔

始於唐時曰懷聖塔輪囷直上凡六百十五丈絕無等級其額標一金雞隨風南北每歲五六月夸人率以五鼓登其絕頂叫佛號以祈風信下有禮拜堂

半天縹緲認飛翬一柱輪囷幾十圍絕頂五更鈴共

語金雞風轉片帆歸

歷代沿革載懷聖將軍所建故今稱懷聖塔



海山樓

建於嘉祐中今在市舶亭前唐子西有登樓  
懷古詩

海山兩遇月明時自是南州一段奇塵土只今無着

處可憐誰與更題詩

宋時經畧安撫于五月五日  
閱水軍教習于其上嘗新詩

越井岡

番禺雜誌云一名臺岡一名越王臺南越志  
謂之天井在城西北三四里唐廣州司馬劉  
恂嶺表異錄云岡頭有古臺基址連帥李玘

於遺址上構亭鄭公愚又加崇飾今在悟性  
寺後郡人呼為越王臺相傳尉陀曾張樂於  
此故老云舊皆夾道栽菊黃花迤邐為九月  
登高之所

萬山衮衮盡東來高處猶存百尺臺回首舊時張樂  
地一杯重與酌蒼苔

### 越臺井

按嶺表異錄云井在州北越王臺下深百尺  
餘磚甃完備云南越趙陀所鑿廣之井泉率

鹵鹹惟此井冷而且甘番禹禰志亦云越井  
半有古甃曰趙陀井水味清甘劉氏呼為玉  
龍泉民莫得汲潘美克平後方與衆共之今  
此井在悟性寺前清甘實為一郡之冠而後  
來乃亭其上而榜焉曰達磨泉初無所據只  
何公異所作南征錄及圖經云達磨初來指  
其地曰是下有黃金取之不盡貧民竭力掘  
之數丈而遇石穴而泉迸達磨云即此是也  
何公乾道中入南蓋此泉已在達磨泉之後

好事者又為此說以附會之今越岡無他井  
即此無疑又嘗讀唐子西集有遊廣州悟性  
寺詩其結句云泉脈來何處中舍定慧香則  
亦指此為達磨井矣

古甃寒潮百尺清偽王題品老陀營渴來不飲盜泉  
水特此翻為達磨名

### 西竺山廣果寺

故江西提刑譚惟寅所建蓋觀音道場每歲  
二月十九遊人最盛

小橋橫絕兩峯環  
白日松風為掩關  
天半樓臺矗金碧  
直疑海上補陀山

東七寺

以下二十八寺列布四方  
偽劉所建上應二十八經  
尚大半無恙今各以寺名為詩  
俾後之覽者屬和焉

慈度天王更覺華  
蒼龍東角梵王家  
普慈化樂成塵土  
興聖猶兼覺性誇

西七寺

文殊千佛顯真乘水月光中見定林昭瑞當時連集  
福咸池今日應奎參

南七寺

井軫南宮煥寶光千秋古勝並延祥祇今兩寺無名  
字地藏旁聯四寶方

北七寺

國清尊勝北山隅證果報恩同一區地藏荒蕪并報  
國尚餘悟性斗牛墟

浮邱山

在郡西浮邱觀之西其高一丈五六尺周四  
百餘步番禺志云東邊有井舊為技龍之  
所後為人所觸一旦自塞按羅山記浮邱即  
羅山朱明之門戶先在水中若邱陵之浮今  
山之四面篙痕宛然有陳崇義者年一百一  
十二歲說為兒時猶見山根舸船數千今山  
去海邊三四里盡為人煙井肆之地此國初  
時浮邱蔣穎叔嘗作挹袖軒於其下仍記吳  
尹言為浮邱上人得道之地有雙鳥故事其

為神仙之窟無疑矣

碧海何年已變田空傳雙鳥舊時仙乘風欲挹浮邱  
袖同訪朱明別洞天

### 珊瑚井

蔣穎叔云葛洪嘗煉丹於此而海神以珊瑚  
為獻有珊瑚井尚在

可怪仙翁亦世情珊瑚還許致殷勤波神不是趙陀  
客即是前身石季倫

### 朝漢臺



臺在城西硬步南越志云熙安縣

齊宋有此縣名

東南

有圓岡高數十丈岡四面為羊腸道說者謂尉陀登此望漢而朝拜故曰朝漢臺嶺表異錄云在西北五里岡原上今址存焉刺史李玳於其上創餘莫亭至今送迎之地又改為朝臺館番禺刻石云今江邊有臺纍纍彼人但名其地為朝臺不知彼是耶此是耶問之故老已莫能知其所在則是在國初已罕有識其處矣張曲江詩津亭壯越臺蓋謂此也

後來人皆以今之越王臺謂為朝漢然津亭  
當在水濱豈應在山上元祐間毛司漕方辨  
正其地蔣穎叔亦同賦詩所謂真乘寺側偶  
同尋潛德幽光一朝發然真乘寺亦在硬部  
其地則近之矣而其臺則平地突起數十尺  
八陞宛然即郊壇也土人至今猶呼拜郊臺而江  
邊纍纍之岡原固自若也自蔣穎叔之誤後  
亦無有辨者朝臺又名武王臺蓋趙陀并桂  
林象郡之初自立為南越武王韓詩所謂樂

奏武王臺者是也亦名雲陽臺或云趙建德  
戰勝韓千秋時張飲於此

倔强難除結尚椎築臺北望欲何為大夫自載千金  
橐誰念韓侯十萬師

劉氏郊壇

一德由來可享天東隣牛祭亦徒然荒涼到處遊麋  
鹿誰識郊壇八面圓

劉王花塢

在千佛寺側桃花並水一二里可以通小舟

蓋劉氏芳華苑故地也

綠陰到處小舟藏  
淺水漂紅五里香  
不見芳華舊亭  
苑桃花應解笑劉郎

蕃人塚

在城西十里累累數千皆南首西向

鯨波僅免葬吞舟  
狐死猶能效首邱  
目斷蒼茫三萬  
里千金雖在此生休

花田

在城西十里三角寺平田彌望皆種素馨花

一名耶悉茗南征錄云劉氏時美人死葬骨  
於此至今花香異於他處

千年玉骨掩塵沙空有餘妍賸此花何似原頭美人  
草樽前猶作舞腰斜

### 石門

在州西南二十里或謂十五里郡國志及圖  
經云呂嘉拒漢積石江心為門嶺表異錄云  
漢將軍韓千秋征南越全軍覆沒之地也按  
漢書云韓千秋兵之入也未至番禺四十里

越以兵擊千秋等滅之又元鼎六年冬樓船  
將軍將精卒先陷尋陘破石門以此攷之則  
石門非千秋覆軍之處乃樓船破越之地也  
而兩山蓋自宇宙以來之物積石之說其謬  
可知

呂嘉積石浪相傳雙闕天開尚宛然成敗古來俱一  
夢千秋何事老樓船

### 貪泉

在石門乃吳隱之酌泉賦詩處番禺襟志云

劉龔惡其名運石填之或云為寺僧所塞今未詳有唐天寶中陳元伯所撰碑銘見昇置廣平堂上

泉本無貪人自清何須一酌始忘情回車勝母君知否見說曾參亦好名

### 沉香浦

晉史云隱之歸自番禺其妻劉氏齎沉香一片重一觔隱之見之遂投於湖亭之水圖經云亦在石門西華寺在浦之旁故有亭曰沉

香

一飲千金事已非那容更載此香歸若教到此方投  
去早落人間第二機

鑒空閣

在金利崇福院之前東坡有贈黃洞秀才詩  
可攷而知也

右帶靈洲左石門何年飛閣倚晴雲南遊不用看圖  
畫曾向坡仙句裏聞

靈洲



洲在水中上有寶陀寺郭璞云南海之間有  
衣冠之氣即其地南征錄云山根如禹足漁  
舟可以往來其間東坡亦有詩

東南佳氣盛衣冠樓閣翬飛縹渺間疑是落星灣上  
見更須題作小金山

### 甘溪

在郡東北五里北山脚下東晉太守陸允所  
鑿引泉以給廣民亦呼甘泉唐會昌間節度  
盧公遂疏導其源以濟舟楫更飾廣廈為踏

青避暑之勝地偽劉時復鑿山為甘泉苑中  
有泛杯池濯足渠避暑亭之類其下流為甘  
溪夾溪南北三四里皆植刺桐木棉旁則坦  
平大道詳見番禺志及嶺表異錄中甘溪  
今不復見圖經并番禺志云即薛薛水也水  
正在北山脚岸高水自石而下其聲薛薛然  
故以為名

甘溪依約舊城東陵谷遷移一夢中春盡踏青人不  
見桃柳老大木棉紅

馬蛟山

在城北七里俗傳昔有蛟化為馬以惑土人然郡邑志乘多不載究不知山名所自來也耆老相傳亦可嗟深山大澤自龍蛇老蛟變化初何怪天馬從來產渥洼

雷洞

在城北山七里下有雷廟穹然一大塚古甃具在俗傳為偽劉雷將軍墓又云劉氏時所鑿謂之雷藏欲以饗雷事見番禺雜志中然

自今觀之為虛墓無疑其上因山為之初不  
封樹近歲為風雨所圮方洞見其中識者亦  
疑為趙陀塚郡人率以正月二十六日傾城  
來遊往往以白桑間之約俗謂洗身吁風斯  
下矣

疑塚崢嶸此不封麒麟彷彿是山中後人未識藏雷  
穴踏破蒼苔古甃空

遠看金腰裏近看石  
麒麟此陀墓形勢也

### 蒲澗

在郡東北二十里亂石山澗間舊有蒲一寸

九節安期生服之飛昇處

拔宅誰能辨有無澗邊空記舊丹爐世間自是多凡骨何處猶尋九節蒲

滴水巖

巖在蒲澗之上飛泉百尺下瀉無地真勝處也

天半飛濤六月寒蒼崖壁立互回環從今好事能題品列作南中第一山

菖蒲觀覺真寺

寺觀並在蒲澗東坡詩云昔日菖蒲方士宅  
後來簷蔔祖師禪是以寺為安期生宅也而  
圖經載遺履之事乃以觀為宅今未詳觀今  
名碧虛中有劉氏碑東坡題名其上郡人歲  
以正月之二十五日為蒲澗節帥使而下傾  
城來遊南征錄云正月二十五日乃劉王生  
日七月二十五日乃安期上昇

千載仙居已渺茫道山佛屋自相望春花秋草年年  
事却作遊人歌舞場

流杯池

在葛蒲觀之東水石天成非由人巧劉氏舊賞也

坳石天然印曲流飛觴寂莫幾春秋山陰千古詩陳跡此地何人記舊遊

葛仙翁煉丹石

在碧虛觀前東嶺上巖壑宵冥人跡所罕至者

見說刀圭已解仙寧須丹竈半人間葛翁本自求勾

漏何意南來訪此山

鮑姑井

鮑姑即靚女葛仙翁妻也與供偕隱羅浮山  
行灸於南海有神艾唐崔煒嘗得之療疾有  
竒效其井今在彌陀寺葛蒲觀然皆湮廢未  
知二者孰是圖經云景泰寺亦有井今已不  
見

為覓丹砂到海濱空山廢井已生塵不將一滴蘇焦  
稿神艾虛傳解活人



懸鐘

在滴水岩崖上人跡所不至仰而視之其形  
髣髴然可望而不可即也好事者引彈射之  
往往有聲

絕壁初無路可通何人特地鑄金鐘神仙底處應難  
詰彈落餘聲和澗松

趙陀疑塚

番禺棊志云在縣東北二百步耆舊相傳陀  
死營墓者數處及葬喪車從四門出故後不

不知墓之所在惟菖蒲澗側石馬舌上有云  
山掩何年墓川流幾代人遠同金腰褭近似  
石麒麟時莫解之但疑其墓不遠蔡如松云  
舊說即悟性寺是也今蒲澗之南平原中枯  
塚纍纍數千人猶謂趙王疑塚予又按南越  
志云孫權時聞趙陀墓多以異寶為殉乃發  
卒數千人尋掘其塚役夫多死竟不可得次  
掘嬰齊墓嬰齊即陀孫也得玉璽金印銅劔之屬而陀  
墓卒無知者且陀死於武帝之初至孫權時

方三百載有奇已尋掘而不可得至今千餘載當益不可攷又不知傳奇載唐崔焯所入果何地耶

漫說曾瞞七十餘老陀疑塚更模糊不知禹葬會稽處也有纍纍如許無

### 寶象峯勝因寺

在白雲之麓景泰之南創始於乾道間俗謂東菴是也

鴻濛誰闢此山川龍象新開二十年最恨東坡早仙

去只教蒲澗入詩篇

### 虎跑泉

在寶象峯之下寺之西盈不滿尺雖久旱不涸也

破寺高僧夜不眠一聲猛虎月明天起來難覓新蹄跡半滴空餘石罅泉

### 動石

在寶象峯上塊然一拳石耳土人云叱則隨動

山中塊石老僧言一叱應如轉法輪元是世人心自  
動請將消息問風幡

白雲洞

在亂石山絕頂有寺九龍泉記云安期生初  
隱於此有九童子現而泉湧因以九龍名泉  
今泉在寺之側

金刹憑陵尺五天勝遊何必羨登仙安期想見身千  
億汗漫人間若箇邊

三教殿

在白雲寺中陶定施財所建也至今香火不絕

大道茫茫鼎峙分箇中誰為破重藩須知問禮當時地不見西方兩足尊

### 鶴舒臺

在白雲前山宛然巨石安期生飛昇時有鶴下迎於此

危臺老石寄層巔鶴駕逢迎不記年今日歸來應一笑山川城郭故依然

大小水簾洞

在白雲之麓東西相距無三百步蓋九龍泉  
下流也

碧澗東西春水添四時踈雨落晴簷珠宮貝闕無尋  
處空見重重掛玉簾

虎頭巖

在鶴舒堂之北崎嶇險絕好事者所未之聞  
予嘗兩至此

絕壁空岩踞虎頭鳥飛不度野猿愁人間有此真奇

境便好乘風訪十洲

景泰山七仙寺

昔傳景泰禪師之始卓錫也有七仙人為守  
其地後來開得石履古鑑各一至今猶扁山  
中

老衲誅茅昔小留七仙陰為護岩幽不將石履呈竒  
怪安得西歸好話頭

卓錫泉

在七仙寺中亦由景泰禪師卓錫得之泉上



有雙蟬月明時往往浮出人卒莫能得之真  
靈怪也

泉源無處不流通隱顯何關卓錫功欲識海潮連地  
脉祇今雙蟬出泉中

順菴

康與之舊宅也在景泰山下高宗御書扁榜  
有龍蛇飛舞之勢今刻石尚存惜風饕兩虐  
日就剝蝕耳

詞人自結一間茅天上宸奎舞瘦蛟見說鬼神猶畏

護瑞光前夜起山坳

### 陵山

劉氏之墓也在郡之東北二十里漫山皆荔  
子樹龜趺石獸歷歷具存昔有發其墓者其  
中皆以鐵鑄之予嘗至此地摩挲斷碑不見  
始末但見其詞皆是葬婦人墓誌考之偽史  
疑是懿陵也他尚有數處如南海縣宣風鄉  
及番禺黃陂新會上臺玉環丫髻山等處皆  
有之

龜趺無處問行踪惆悵連江荔子紅鐵鑄雀鬼真大  
錯驪山銅柱久成空

### 馬鞍山

南越志云秦始皇時望氣者云南海有王氣  
遂發卒千人鑿北山之岡謂之鑿龍今所鑿  
處形如馬鞍故為名焉番禺志云在郡北  
三十里

塹山堙谷浪為謀餘力猶窮嶺外州見說揭竿從壤  
上祖龍當日漫東遊

琵琶洲

在郡東三十里以形似名俗傳洲在水中與水升降蓋海舶所集之地也

髣髴琵琶海上洲年年常與水沉浮客船昨夜西風起應有江頭商婦愁

相對岡

在州東三十五里兩山雄拒江上身接往來之要衝也

海門高並兩峰寒大艣輕帆自往還安得百靈移一

島却教塵世看三山

南海廟

在郡東南水陸俱八十里扶胥之口蓋四瀆  
之一也廟中有波羅密樹銅鼓及韓退之所  
作記唐開元中祭文等碑又有西廟在城西  
五里

宮闕參差海上開吐吞波浪起風雷英靈萬古扶宗

社奠醜區區何足推

大英之助也

浴日亭

在扶胥廟之前小山上東坡有詩番禺襍志  
謂之看海亭

亭倚蓬萊幾許高下臨無地有驚濤坡仙想得江山  
助八語端為天下豪

### 銅鼓

南海東西廟皆有之東廟者徑至五尺五寸  
高有其半俗謂洪聖王舊物蔡如松作懷古  
詩嘗辨之云銅鼓之說出於隋書南夷傳夸  
人酋長好鑄銅鼓有事擊鼓夸人盡集女子

首飾盡戴銅釵取釵擊鼓蔡之說止於此殊不知虞喜志林已載建武二十四年南郡男子獻銅鼓有銘又後漢書馬援好騎射善別名馬征交趾得駱越銅鼓乃鑄為馬式以進則知銅鼓在後漢光武時已為希得所以有南郡之獻非止見於隋時也今廟中之鼓自唐以來有之番禺志已載其制度凡春秋享祀必雜衆樂擊之以侑神又府之武庫亦有其二其一蓋唐僖宗朝鄭績鎮番禺日高州

太守林霽所獻初因鄉墅小兒見鳴蛙之怪  
遂得於蠻酋大塚中事見嶺表異錄在唐時  
既能為怪則至今不知其幾百年物矣鼓形  
如腰鼓而一頭有面製作精巧所謂銘志絕  
無有也只周遭多鑄蝦蟆兩兩相對不知其  
何意

石鼓嵯峨尚有文舊題銅鼓更無人寶釵寂莫蠻花  
老空和楚歌迎送神

波羅蜜果



南海東西廟各有一株椶枝大葉實生於幹  
若癭瘤然有大如瓠廟官每歲於九十月熟  
時取供諸臺其他莫敢有過而問者以蜜煎  
之頗為適口相傳云西域種也本名曰曩伽  
結

纍纍圓實大於瓜想見移根博望槎三百餘篇誰識  
此世間寧復有張華

### 王登洲

在廟東之江心僅塊石耳俗傳南海王為河

源人其初因死於兵屍流至此不復去後人  
遂立為廟此荒誕不經之說南海志諸書皆  
不載

四瀆初分有物尸天開地闢共為期齊東野語真堪  
笑請誦昌黎十丈碑

### 靈化寺

寺在扶胥之北五里休咎禪師道場也蔣穎  
叔有記畧云師姓梁氏終於元和中昔嘗謁  
鎮海將軍廟欲乞廟為伽藍王不許乃為師

別擇此地仍以楮錢定其四隅至今為寺鎮  
海將軍即南海王也師嘗為王授三飯五戒  
使無害生靈云

黃木灣前一畝宮廟靈規地古來雄江頭不見風波  
惡多謝禪師受戒功

### 走珠石

在湖南舊傳有賈胡自異域負其國之鎮珠  
逃至五羊國人重載金寶堅贖以歸既至半  
道海上珠復走還徑入石下終不可見至今

此石往往有夜光發疑為此珠之祥

底事明珠解去來當時合浦已堪猜賈胡不省何年  
事老石江頭空綠苔

### 盧循河南故城

在郡之南岸古勝寺之西俱云劉氏故壘土  
人亦自呼為劉王康今則居人實焉按南越  
志河南之洲狀如方壺乃盧循舊居又番禺  
雜志云盧循城在郡之南十堂與廣隔江相  
對俗呼海南又呼水南劉氏舊為倉廩南海

集中載龍溪蔡如松懷古十二詩亦嘗辨其  
譌此為盧循城明矣圖志故老尚失其實殊  
為可怪今其中故址隱然規模髣髴斷碑廢  
瓦徃徃為遊人所得豈倉廩之舊乎而盧亭  
蛋戶皆盧循之遺種也

蛙據方州妄自尊沈郎百萬若雲屯歸舟無路尋巢

穴空有盧亭舊子孫

循據廣州聞劉裕北伐從徐道覆之說北出  
襄建康裕遣沈田子等乘海奄至傾其巢穴

### 大通寺

在河南大通津上有達岸禪師化身在馬師

新興人名志清凡兩暘之禱迎致輒應寺前  
後老檜幾百株婆娑掩映相傳唐天寶間所  
植

老木槎牙欲擘雲門前流水我知津過江一雨如盆  
馮競禮真如不動身

### 抱旗山

郡之客山也其勢如抱旗古木參天林壑幽  
邃

面勢翩翩天外山彩旗長在翠雲間太平官府無公

事益好高牙相對閑

### 花山寺

在扶胥北五里漫山皆杜鵑花俗傳方春時  
婦女往往就結其花以為熊羆之兆蔣穎叔  
詩云開遍滿山紅躑躅香風一簇美人來蓋  
謂此也

萬花春老正紅酣不是叢林優鉢曇山下女郎來問  
訊未饒萱草解宜男

### 黃巢磯

在清遠縣境上波流激湍白石鑿鑿相傳黃  
巢覆舟處也

天下縱橫轍跡環舳舻不許度前灣江神少為摧兇  
焰要使留金六祖山

南華有黃巢施金置田  
疏自稱為率土大將軍

### 金芝巖

在清遠縣東北二十五里南來者多以僻左  
不得至

碧落三洲天下奇仙城誰復識金芝可憐隔斷黃茅

路不得騷人賦一詩

碧落洞在洵陽三洲  
岩在古康皆佳處也



清遠峽

一名中宿峽在清遠縣東二十里兩山對峙如擘太華舊傳海艘乘潮一夕而至圖經云黃帝二庶子採崑崙竹為黃鐘管居於此山故名至今廟貌猶存

崑崙裁竹事空傳不見春潮送客船只似蜀江江上路兩山中挾手巾天

峽山廣慶寺

寺在峽中唐韋宗帥南海時以俸錢買菜園

親帖在

韋郎故地久蕭條只有泉聲響夜潮行客往來回首  
地玉環無處覓嬌嬈

飛來殿

在廣慶寺中胡愈所作記云梁武帝末峽有  
二神人往叩上元延祚寺正俊禪師曰本峽  
居清遠上流建一道場足立勝槩師能去否  
俊然其說俄然中夜風雨暴作黎明薄霽啟  
戶而觀則琳宮紺宇一望莊嚴儼然在峽中

矣

嵯峨古殿記飛來千古傳聞亦怪哉龍象漸隨塵土  
化却疑神物欲飛回

達磨石

在廣慶寺西俗傳達磨坐禪處平坦光瑩廣  
一丈餘

葱嶺初無一字傳名山到處即為禪只今石上留公  
案面壁何須更九年

釣臺

在飛來殿之西乃趙胡釣得百觔金鯉之地  
釣得神魚金作鱗廢臺百尺漫嶙峋然綸不入非熊  
夢當日何人老渭濱

### 和光洞

圖經云其上有五色榴花皇祐中前永定縣  
尉安昌期所隱題詩處也中有我與衆生寧  
計校逢人一味是和光之句故名

和光深洞隱昌期門鏤烟蘿不可窺欲問榴花好消  
息只今難問舊題詩

沉犀潭

昔傳崑崙奴獻犀至此犀忽沉入海中百計  
購之終不復出後有漁者得金鑠一尺餘以  
進

西來異獸路應迷金鎖何年落此溪不比李侯心似  
水歸舟自擲石門西

龍磨角石

石在峽口水中國經云濶三丈餘文緻而澤  
者舊相傳每歲春時有群龍集於此磨角其

上痕跡班班然水落而痕可見竟莫詰其所  
以然

舊說神龍水底蟠何年電掣與雷奔至今舟子相呼  
喚猶指江邊石上痕

### 老人松

在飛來殿西南十餘步間大觀中錢師愈從  
者嘗刻之後見夢於殿直吉老者事詳具於  
胡愈記中

上古輪囷說壽樗何人玉斧劖霜腴有知定是非凡

物盍作堂堂五大夫

資福寺羅漢閣

在東莞縣市中僧祖堂始營此閣規制巨麗  
東坡為之記且以犀帶所易佛腦骨薦以白  
壁施之見東坡塔銘并吳玗所跋記語寺有  
再生柏東坡亦有贊今猶存壁間

千柱依然跨寶坊庭前柏子久荒涼明珠白壁無人  
識賴有斯文萬丈光

鳳凰臺

在增城縣圖經云熙寧七年有鳳凰飛集於  
法華寺羽毛五色光彩陸離高六尺長九尺  
百鳥隨之食頃從西北去觀者如堵程公師  
孟以聞李公思義遂創臺其上

鳳去臺空歲月更百年陳迹掃榛荆清時已慶三登  
瑞盃向朝陽更一鳴

### 會仙觀

在增城縣南三百步許何仙姑所居也姑生  
於唐開耀中嘗於旁穴得雲母石服之體中



漸覺輕舉有凌雲之致一日告其母以群仙  
之會吾將暫往遂不復見今祠堂丹井具在  
觀中

綽約長眉海上仙久食雲母學長年山中丹井今無  
恙為弔南充謝自然

### 龍窟

在新會縣西萬壽寺之後兩山相望其中不  
能百步東山數穴窅不可窺以石投之其聲  
隱隱不絕至西山則玲瓏相屬表裏洞開故

老相傳為神龍出入之地圖經云每雷雨大作有龍在其中破空而出踴躍震動習以為常至今或遇亢旱禱之輒有靈驗

變化靈踪亦可疑玲瓏數穴似仇池滄溟咫尺不歸去安得神龍如許癡

### 金牛山

在新會縣此山雄據闐闐綿亘數百里雲山海月舉無遁跡雖白雲景泰眺覽之勝亦不  
是過舊無亭榭予始剏海月竒觀於其上為

登臨遊息之所圖經云昔此山濱水有漁者  
見一牛其色與索皆金也光芒閃爍方欲抵  
岸為漁者所驚遂入此山有廟尚存

金牛去後久淒涼好景乾坤亦秘藏  
滄海無窮月無盡從今收拾入詩囊

### 仙湧山

在新會縣西七十里圖經云舊無此山一夕  
風雷震怒湧出數峯林巒周具因以仙湧名  
且取其名以建寺

龍伯何年釣巨鰲兩峰漂蕩入洪濤人間靈迹無尋  
處仙湧羅浮相對高

羅浮山記云昔有山自會稽浮海薄於羅山因名為羅浮

### 媚川都

偽劉採珠之地也隸役凡二千人每採珠因而死者靡日不有所獲既充府庫復以餽棟宇潘公美克平之後於煨燼中得所餘玳瑁珍珠以進太祖令小黄門持視宰相且言採珠危苦之狀開寶五年詔廢媚川都選其少壯者為靜江軍老弱者聽自便至今東莞及

瀕海處往往猶有遺珠

泚泚愁雲弔媚川蚌胎光彩夜連天幽魂水底猶相  
泣恨不生逢開寶年

### 劉氏山

悟性寺後山南征錄謂之劉王山蓋偽劉曾  
作臺觀於其上

一徑縈紆夾粉牆嚮來臺館化僧房周遭老木依然  
在曾見劉家偽帝王



南海百咏大德間鏤版行世後未有重梓之者  
余家向有抄本承謔踵謬不無魯魚帝虎之失  
恨不能一一訂正之今春苔賈錢仲光攜一冊  
至點畫精楷裝潢鄭重卷端有印章曰絳雲樓  
乃知為虞山錢氏家藏善本也借觀三日而校  
勘之功畢因命學徒重為繕寫珍篋司視向  
之承謔踵謬者相去遠矣鐙下對酒展卷欣然  
因連浮大白而為之跋時

康熙己亥歲長至前三日艾亭金粟識於城東

書塾之碧雲紅樹軒